

Su 2 de cabudanni de su 2012 in sa crèsia de su Rimèdiu in Orosei: Paràulas de Gràssia

Su 2 de cabudanni de su 2012 sa crèsia de su Rimèdiu de Orosei at istrangiadu sa manifestatzione "Paràulas de Gràssia" ammanitzada dae s'Ufitziu de sa Limba Sarda, cun s'agiudu de s'assessoradu a sa Cultura, de s'Ufitziu Tècnicu, de sos priores de sa festa de su Rimèdiu, de Maria Fara e Letizia Beccari e de su Cuncordu Urisè.

Pro sos chentu annos de sa publicatzione " Canne al vento" si sunt bortados cantos de su romanu in ue si faeddat de Orosei e de sa festa de su Rimèdiu. Amus isseberadu de cramare custa manifestatzione "Paràulas de Gràssia" ca est unu giogu de paràulas chi ponet ligàmenes intre de su nùmene de s'iscridora Gràzia Deledda e sa paràula " gràssia" chi est una genia de miràculu, unu donu chi Deus e santos faghent a chie los invocat. Cunforma sa dotrina catòlica est fintzas su èssere in amistade e in paghe cun Deus. E tando, non b'aiat mègius logu si non sa crèsia de su Rimèdiu pro allegare de paràulas de gràssia, fintzas pro more chi Gràzia Deledda in su romanu " Canne al vento", alleghende de Orosei, iscriet pròpiu de custa crèsia e pro more chi pròpiu in cussas dies incumentzaiat sa festa de su Rimèdiu.

Sa presentada de sa manifestatzione est istada fata dae sa diretora de s'ULS Mariantonietta Piga, mentres prof. Michele Pinna, faghende un'istèrrida subra de sa figura de Gràzia Deledda pro sa literadura italiana e pro cussa sarda, at alleghadu subra de s'importu chi aeret tènnidu custu romanu si fiat istadu iscritu in sardu, pro sa limba sarda matessi.

A pustis de prof. Michele Pinna at faeddatu Giorgio Rusta, isprichende pro ite at isseberadu de sonare bator cantzones cantadas dae Andrea Parodi: unu donu pro s'ammentu suo. Sos operadores de s'Ufitziu de sa Limba Sarda, Angelo Canu, Mariantonietta Piga, Gianfranca Selis, Giovanna Chessa, Valentina Schirru, Sara Nieddu, Mario Antioco Sanna e Ivan Marongiu, ant duncas lèghidu cantos de " Canne al vento" bortados in sardu, cantos in ue si faeddat de sa crèsia de su Rimèdiu e de Orosei; sas leturas sunt istadas intramesadas dae sa mùsica de Giorgio Rusta e dae sas boghes de Letizia Beccari e Maria Fara, chi ant cantadu Astrolicamus, Armentos, Le memorie della musica (bortadu in sardu dae Giorgio Rusta) e Non potò riposare.

At cuncruidu sa serada su cuntzertu de su Cuncordu Urisè.